

■ TRIBUNA POLITICA

La paraula olimpica

DA SILVA SEMADENI,
CUSSEGLIERA NAZIUNALA

Gieus olimpics èn factibels, duraivels, financialmain supportabels ed ina schanza unica.» Uschia la resumaziun da la propaganda che passa dapi mais sco ina splattitscha tras il Grischun. Schizunt la «Neue Zürcher Zeitung» discorra d'ina paraula d'enviern che vegn servida a la populaziun grischuna. E la «Weltwoche», segir betg il portavusch dal moviment ecologic u da la Partida socialdemocratica, demascrecha ils plaids dals promoturs sco trics da marketing per gudagnar la votaziun. Las gasettas grischunas derasan e sustegnan a medem temp supplements nuncritics plain laudavaglias.

Ils promoturs da San Murezzan 2022 (quai è il vair num dals gieus e betg Grischun 2022!) sfarlattan milliuns per lur propaganda dals bels plects, importeschan promis da l'entira Svizra per far squitsch e cusseglier federal *Ueli Maurer* ha participà ad almain 12 occurrenzas en Grischun per far empermischuns ch'el na sa betg garantir. Il cumbat da votaziun en Grischun è sco il cumbat da David encunter Goliat. Da nossa vart ina gruppa da voluntaris cun in budget da var 80 000 francs, da l'autra vart ina maschinaria cun employads e biros da propaganda e cun chasas edituras che sustegnan la campagna dals promoturs cun la palutta gronda.



Mo tge signifitga San Murezzan 2022 propi? Duvrain nus quest mega-event per il salvament da noss turissem che è en la crisa? Spassegian bainbaud millis e millis da Chinois sin la promenada da Tavau u sa diverteschan en avegnir numerus Giapunais sin las pistas en l'Engiadin'Ota? Era la «NZZ» è sceptica e scriva ch'ils giasts da l'Asiarivian en Europa sco turists dal «Sightseeing». A Lillehammer vesan ins numnadain nagins Giapunais che van culs skis, malgrà ils gieus olimpics alvs il 1994. Ina dat nagin studi scientific che cumprova che gieus olimpics portian suenter l'occurrenza in augment dal turissem u procurian per in meglier image. Schizunt ils experts dals promoturs da San Murezzan 2022 ston admetter che l'effect a lunga vista è betg calculabel. E dal reminent: Na fuss i forza tuttina betg pli prudent da promover il turissem da l'entir chantun che da sustegnair mo quella marca grischuna «Top of the World» e quai anc cun in turissem da massa betg giavischà?

Ils gieus olimpics San Murezzan 2022 custassan passa quatter milliardas francs. Il cussegl federal ha empermess ina milliarda (la decisiun definitiva è dentant en la cumpetenza dal parlament), il Grischun duai metter a disposiziun 300 milliuns da sias reservas surtut per garantir la segirtad dals gieus. Tgi che surpiglia il deficit prevesibel n'è anc betg cler. En il parlament federal existan dentant grondas resalvas, la cumissiun da finanzas exclude unanimamain da surpigliar ina garanzia da deficit, ella pretenda explicitamain ch'il chantun Grischun surpigliass quel.

En gnanca sis onns vegnissan pia reservas da lavur construidas che servissan normalmain forza per duas u trais giadas quest temp. Las schanzas che la mastergnanza indigena rivia da dumagnar la concorrenza internaziunala èn pitschnas, la schanza da stuair sa cuntentar cun las miclas è pli gronda. E tge capita suenter ils 2022? Restan anc raps per realisar projects en las autras regiuns en il Grischun? U stuain nus anc pajar forza durant decennis ils debits dals gieus olimpics sco che quai è succedi ad Albertville, Lillehammer, Nagano, Salt Lake City, Torino u Vancouver? Jau vulesch che gieus olimpics restassan mo ina paraula d'enviern cun ina buna fin. In na ils 3 da mars garanteschas quai.